



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : Tir Yimiyim

tiryimiyim@aolima

tir yimiyim TAPAK 8

Arunachal-i Assam den arrtsü angatetteptsü: CM Pema Khandu

Malaysia PM inyaktsü Ismail Sabri shimogo

VOL. XVIII NO. 308 (ADOK 308) DIMAPUR KÜPTOKNÜ (SATURDAY) LUROI (AUGUST) 21, 2021 ₹ 5.00

## School ajak nungi tesayurtem AEP training nung adentsü metetdaksür

**Dimapur, August 20, 2021 (TYO):** Nagaland Board of School Education (NBSE) aser Nagaland State AIDS Control Society (NSACS) yaritepa Adolescence Education Programme (AEP) ka agitsü.

August 25 aser 27, 2021 anepdang 10:00 ako nungi anüngdang 12:00 ako tashi iba sentong ya tesayurtem atema online training programme agitsü.

Adolescence Education Programme (AEP) ya Ministry of Education (MoE), Department of School Education & Literacy aser National AIDS Control Organization (NACO), Government of India yaritepa inyakba sentong ka lir.

AEP ya arishi küm 10 nungi 19 tsüngda aliba tanur dang HIV dak sendakba osang aser sexual

## Nagaland sorkari sen angutsü atema senden amen: RPP

**Dimapur, August 20, 2021 (TYO):** August 18 nü Nagaland sorkari senden amentsü ayongbaji tetsür nem shilem lemzüktütsü atema masü saka senotsü angutsü lenmang bushitsü atema dang liasü ta Rising People's Party (RPP)-i metetdaksüo.

"State sorkari tetsür nem shilem lemzüktütsü aser tanga onüktem tenüng amer ULB funds nungi 2023 state assembly elections nung amshitsü sen bendentsü atema senden ayonga amen. Anungji Nagaland United Government (NUG)-i aibelenba metongshitsüla aser Nagaland nung tetsürtem aser kin 14 dang tatok meshitsüla" ta RPP-i tanü

## Arishi küm 12 ser temapur atema ZyCoV-D vaccine amshitsü

**New Delhi, August 20, 2021 (Agencies):** India nung arishi küm 12 ser temapurtem asoshi Covid-19 vaccine amshitsü temelaba agütsüo.

Central Drugs Standard Control Organisation (CDSO) indang Subject Expert Committee (SEC) ajanga Zydus Cadila-i yangluba Covid-19 vaccine (ZyCoV-D) amshitsü melaogo.

ZyCoV-D ya dose asem agütsüba mozü ka lir aser ajem mamshir. Iba vaccine ya Tropis ta ajaba needle-free system ajanga agütsür.

Indian sorkari tang Covid-19 atema vaccine 5 amshitsü temelaba agüja lir. Vaccine temji Covishield, Covaxin, Sputnik V, Moderna vaccine aser J&J single-dose vaccine lir.

July 1, 2021 nü Zydus Cadila-i 'emergency use' atema Covid vaccine indang temelaba meshia

health dak sendakba osangtem metetdaksütsü atema lir.

AEP ya linük nung aliba secondary aser higher secondary school ajak nung agitsüba sentong ka lir.

Iba dak sendakba nung NSACS-i 2010 nungi AEPkübok tesayurtem asoshi training programmes agia arur.

Nagaland nung Registered Institutions ajak nungi tesayurtem adentsüla aser tekolakpurtemi iba training nung tesayur ka dendaksütsü atema mapa inyaktsü metetdaksüo.

Iba training programme indang registration link ji WhatsApp groups aser school indang email ID ajanga metetdaksütsü aser shilemagiba tesayurtem nem E-Certificates agütsütsü.

ashü. NUG ya NCG (Nagaland Consultative Government) ta ajatsüla kechiyong PDA/NUG sorkar akümba sülen nungi committees/commissions tentetba manener aser consultative meetings tanen maka amener, ta RPP-isa ashü.

Nagaland state sorkari committee balala tentetba aser consultative meetings tanen maka amenba ya nisungtem ashioktsütsü aser mapang atsülangtsü atema dang lir. Sorkari teblemstü onüktem atema telemstetba magir saka state senpong nungibo sen ajak oadoker, ta RPP-isa metetdaksüo.

liasü. Zydus Cadila-i arishi küm 12 nungi 18 tsüngda alirtem dena nisungtem dak vaccine tendanga liasü.

Linük ajungalen nisung 28,000 tema dak vaccine tendanga nung efficacy rate 66.6% tashi ngutet aser iba nung ajemdaker parnoki sorkar dang nungi temelaba meshi.

Alima nung coronavirus anema mezüngbuba plasmid DNA vaccine ji ZyCoV-D lir.

Zydus Cadila-i Department of Biotechnology den yaritepa iba vaccine yanglur. India nung yangluba Bharat Biotech indang Covaxin sülen ZyCoV-D vaccine ya tanabuba lir.

Zydus Cadila-i küm nung ZyCoV-D vaccine indang dose million 100 nungi 120 tashi yanglutsü sentong lir ta metetdaksüo.

## State Level Monitoring Team-i Mkg aser Dmr semdang



Deputy Commissioner, Dimapur indang Conference Hall nung August 20, 2021 nü Dimapur District Task Force on COVID-19 pur senden amenba mapang tangokba noksa ka yangi angur.

**Dimapur, August 20, 2021 (TYO):** August 20, 2021 nü Mokokchung district nung COVID-19 tensa meyipa reprangshiba senden ka menogo. Iba senden nung State Nodal Officer on COVID-19 aden.

Senden nung mendenji Mokokchung Deputy Commissioner aser District Task Force chairman liasü aser District Task Force (DTF) züngsem ajak aden.

"COVID-19 tensa reprangshimtsü aser iba dak sendakba khuretem metettsü atema semdang" ta Agriculture Joint Secretary & COVID-19 state level monitoring team züngsem, Sachin Jaiswal-i ashü.

"District Task Force Mokokchung-i district nung vaccine agiba maparen takok ngua inyakba atema tenüngsang agütsür" ta paisa metetdaksü.

"Maneni contact tracing mapa tuluba inyaktsüla aser 90% vaccination ngua aliba yimtsüngtemi 100% atongtsü atema merangtsüla. Talisa 50% teküpok dang ngua aliba yimtsüngtem nung District Task Force-i mapa talila inyaktsü ayongzüker" ta Sachin Jaiswal-isa metetdaksü.

Senden nung Joint Director, H&FW aser State Level Monitoring team züngsem Dr.

Kika Longkumer-ia home isolation kübok shirangertem jungjunga reprangtsü aser mapang shitak nung tendangtsü aser anepalutsü indang ashü.

"Covid menatepba azüoktsü atema positive puteter ajak indang contact tracing maparen jungjunga inyaktsüla" ta Dr. Kika-isa ashü.

CMO Mokokchung, Dr. Chubala Aier-ia district nung COVID indang mapa inyakba osang lemsatetp.

Senden amenba sülen State Level Monitoring Team-i COVID Care Centre (CCC) District Hospital & COVID Hospital semdang.

**DIMAPUR:** Dimapur District nung Nodal Officer for COVID-19 management aser Secretary, PHE, Kesonyu Yhome, IAS-i tanü Dimapur District Task Force den ajurutepa senden ka menogo.

DTF Dimapur-i tayongzükbaka aika ajuruaka district nung COVID tensa kanga junga anepaluba atema Yhome-i tenüngsang agütsü.

Paisa civil society telok balalai Dimapur nung COVID-19 dak sendakba maparen inyakba atema pelaba metetdaksü.

Yhome-isa Dimapur nung COVID indang vaccine agütsüba maparen junga inyakba atema pelaba ashü aser maneni vaccine

ajema agidak temolung agütsütsü ayongzüker.

DTF-i district nung vaccine agütsüpur ajak nem vaccine agütsütsü aser Covid-19 dak sendakba medical nungdaktem anepalutsüla, ta paisa ashü.

Senden nung Joint Director, H&FW aser Dimapur Covid-19 atema Medical officer, Dr. Tiasunep-i public dang vaccine indang osang tiyazü prokshiba jangjashitsü atema mapa inyaktsü ayongzüker.

DTF-i contact tracing mapa tajungba inyaktsü atema Surveillance team den yaritepsüla aser Test -Track -Treat -Vaccinate inyakyim takok ngua inyaktsü ayongzüker, ta Dr. Tiasunep-isa metetdaksü.

Senden nungsa Dimapur DC, Rajesh Soundararajan-i Dimapur District nung Covid-19 atema mapa inyakba osang tatsüka lemsatetp.

Paisa COVID-19 wara nung civil society, lokti tentet, tamangba yimsü dak sendakba teloktem aser arogotemi yaritepba atema pelaba metetdaksü.

Dimapur DC-isa CMO Dimapur dang vaccine ajema agiba tesemtem jangjatsü aser bangdak administrative officers den yaritepa item tesemtem nung vaccine agütsütsü atema mepishia ashü.

## COVID-19 Nagaland: 92 dak putet, 76 taneptsü angu & 1 asü

**Kohima, August 20, 2021 (TYO):** Hokolbarnü Nagaland nung nisung 92 dak COVID-19 putet, 76 taneptsü angu aser COVID-19 agi shiranger ka asü.

"Tesüüba ghonda 24 tsüngda nisung 92 dak COVID-19 aliba putet. Parnokji Kohima nung 39, Dimapur nung 21, Mokokchung nung 20, Tuensang nung 4, Phek nung 3, Mon nung 2 aser Kiphire, Peren o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashü.

"Tesüüba ghonda 24 tsüngda COVID-19 puteta alir nisung 76 tashi taneptsü angu. Parnokji Dimapur nung 38, Kohima nung 23, Mokokchung nung 9,

Tuensang nung 3, Kiphire nung 2 aser Peren nung 1 lir" ta paisa ashü.

Tanü taneptsü angur züngsema nisung 26,991 kümogo aser ibaji 91.55% lir. Tang COVID-19 puteta alir nisung 1,032 anepaludar, ta Dr Kikon-isa shisem.

"Hokolbarnü Kohima nung Covid-19 puteta alir ka asü aser iba nisung züngsema tasür ajak agi 609 kümogo saka nisung 14 bo tanga tashidak ajanga asü" ta paisa metetdaksü.

"Tang tashi nung COVID-19 alitsü akok ta temolung melemba sample 298,164 tendangogo. RT-PCR ajanga 105,486, TrueNat ajanga 72,440 aser Rapid Antigen Test ajanga 120,238 tendang" ta Dr Kikon-

isa ashü.

"Brihostibar tashi nung nisung 644,463 nem COVID-19 vaccine indang dose 82,058 agütsüo" ta State Immunization Officer, Dr Ritu Thurr-ia ashü.

Vaccine agirtemji frontline workers 60,846, healthcare workers 15,989, arishi küm 45 ser temapur 190,415 aser arishi küm 18 nungi 44 tsüngda alir 377,213 lir, ta paisa ashü.

"Vaccine agirtem rongnungi nisung 178,595-i dose anaprong agiogo. Parnokji frontline workers 42,725, healthcare workers 12,803, arishi küm 45 ser temapur 110,215 aser arishi küm 18 nungi 44 tsüngda alir 12,852 lir" ta Dr Thurr-isa metetdaksü.

## Advisor Noke Wangnao-i CTI nung Commandant Office semzüksü



Toluvi, Dimapur nung Commandant Home Guards indang office building tasenba indang nungshilong sayaba sülen tangokba noksa ka nung Advisor Noke Wangnao den Director General, SDRF, CD, Prison, Rupin Sharma IPS angur.

**Dimapur, Luroi/August 20**

**(TYO):** Advisor, Home Guards, Civil Defence and SDRF Nagaland, Noke Wangnao-i August 20, 2021 nü Central Training Institute, Toluvi, Dimapur nung Home Guards Commandant indang office building tasenba semzükja liasü.

Iba sentong nung tesemdang tongti ka ama jembiba mapang, district kübok tesem balala nungi nüburtsem nem training agütsüba atema Noke-i iba Institute tenung sanga liasü aser training agir, training agütsür aser volunteer temi maparen balala nung tongti shilem agiogo aser talisa tashidak wara agi tesem ajunga sünger nüburtsem timtemba mapang alaketa mapa tajung inyaka arur, ta ashi.

Pai Home Guards, Civil Defence aser SDRF nung

ketdangsur aser züngsem ajak dang maneni iba institute ajanga volunteer nem lendong-tüdong balala ketdangsiüsü asoshi training agütsü ajungshia liasü.

Home Guards ya sepaitem den medemdang, anungji personnel tem kanga kumdanga aser saksalema alitsüla, ta Advisor Noke-i ashi.

Sentong metenzük dang pai office building tasenba semzükja liasü.

Director General, SDRF, CD, Prison, Rupin Sharma IPS ajanga sentong nung o tatsüka jembiba mapang, iba campus ya 1988 nung lapoka nüburtsem aser volunteer aika nem tanü tashi training agüja arur, ta ashi.

Private security agencies atema CTI ya training agütsüba reju ka ama amshitsü atema state sorkari sangdongogo, ta pai ashi.

EE, PEP Chumukedima ajanga technical report agütsüba mapang, storey ana atongtepa yangluba office building ya sen 3,78,28,000 agi yanglu aser ali tasazük 10136 sqft alitsü, ta ashi. Ground floor nung takdang 9 den metzü meshiba tesem ana lir, mezüng floor nung takdang 7 den conference hall ka aser metzü meshiba tesem ana lir.

Iba sentong nung Tsüngrem temoatsü jazüka Pastor, CTI church, Asemba Longchar-i sarasadem aser Commandant General, Bendang Lemtur, IPS ajanga tepela ankep o jembiba.

Iba sentong nung Dy Commandant General, Medozhalie Penyie menden liasü aser sentong nung Home Guards, Civil Defence aser SDRF nungi ketdangsiüsü anir züngsemtem dena liasü.

## MSME Development Institute ajanga awareness sentong ayongzük



**Dimapur, Luroi/August 20**

**(TYO):** MSME Development Institute, Dimapur, Ministry of Micro, Small & Medium Enterprises, Government of India ajanga Aoyimkum Village Community Hall, Dimapur nung August 20, 2021 nü 'Awareness Program on Swachh Bharat Abhiyan' sentong ka ayongzükja liasü.

Iba sentong nung Tali Longchar, Jt. Director, MSME Development Institute ajanga jembiba mapang, Swachhta Hi Sewa (Cleanliness is service) ya linük ajanga nung

ayongzükba awareness aser mobilization sentong ka lir, koba Ato Kilonser Narendra Modi-i tenzüksü, ta ashi.

Plastic jana aser khen amshiba plastic ketdangsiüsü asoshi nükjidong yur iba sentong ya tenzük, ta pai ashi.

SHS ya nisung aliba ki, lokti balala aser tamangba yimsü indang ki nung jana ketdangsiüsü indang lir, anungji asen müketa aliba tesemtem

nung plastic indang jana-reja mamshitsü asoshi nüburtsem agütsüba reju ka ama amshitsü atema state sorkari sangdongogo, ta pai ashi.

ayongzükja liasü.

Iba sentong nung Imchainba, Chairman AVC ajanga o tatsüka jembiba aser Alvin, Asst. Director, MSME DI, Dimapur ajanga COVID-19 tashidak agi tesem ajunga sünger aliba mapang mürekmejutsü indang jembiba liasü. Paisa nüburtsem dang mask agitsü aser social distancing yimya amshitsü ajungshia liasü.

Iba sentong tembangba sülen dustbin (80 litre) tejang 15, surgical mask tejang 1000, N95 mask tejang 25 aser sanitizer 25 lema agüja liasü.

## MOLUNGNEN O

"Onok tasü ita dang alir, onoki iba ali temang nungi pilar Kibuba den kidang alitsü-ang onoki aginür." 2 Korint 5:8



Asü: 14-08-2021

Asür Temsüyanger Longchar, shirang tenzükba mapang nungi tasüba anogo tashi nung kija aser kibong, Arogo aser lokti kwikati rongsen aser nübu tenla den tamang sarasadem agi ozü nungita yaria aruogo nenok ajak dang kangasa pelar.

Ozüi nenok nem meyipa agütsüsü kecha maka saka Tsüngrem takarsangi nenok nem item temoatsü lepa agüjang ta ozü sarasadem.

-Kinungtsü aser kinungertem

## Changtongya nung Longma Watsu Sungki Kilem semzükogo



**Dimapur, Luroi/August 20**

**(TYO):** Watsü Unit Changtongya Town indang Longma Watsü Sungki Kilem sayaba sentong ka August 20, 2021 nü agia liasü, kong Advisor, Govt. Of Nagaland, Imnatiba kinungtsü Supongsenla Ati ya tesemdang tongti ka ama shilem agia liasü.

Iba sentong nung tesemdang tongti ka ama jembiba mapang, la nem Longma Watsü Sungki Kilem semzüksü asoshi maongka agütsüba atema Supongsenla-i pelaba lemsatöp.

Watsü Unit Changtongya asoshi ibai takok tuluka lir aser alizüng ka tongtetba alitsü, koba tarutsü putu asoshi rongsen ka asütsü, ta lai ashi.

Watsü Unit Changtongya-i

nüburtsem aser lokti asoshi mapa tajung inyakba atema lai pelaba lemsatöp liasü.

Iba sentong nung Rorheu Peseyie (NCS) SDO (C) Changtongya; Watsü Mungdang Mokochung tir Maonginla aser T. Alemla, Convenor, Construction committee nungertemia o tatsütsü jembiba liasü.

Construction Committee osang ya P. Onen Lkr ajanga agütsü. Iba sentong nung Chubakokla Lkr menden liasü aser Watsü Unit Changtongya Town tir R. Anungla Aier ajanga tepela ankep o jembiba. Maneni iba ki meshiteta Rev. Temshi Pastor CTBA ajanga sarasadem aser sentong tembanga Sentila, Ass. Pastor Women Tsumokkong Baptist Arogo ajanga sarasadema liasü.

## Tongpang Ozüküm-i Fazl Ali College semdang

**Mokokchung, 20 Aug**

**(TYO):** Minister for PWD (Mechanical & Housing) aser Chairman DPDB Mokokchung, Tongpang Ozüküm-i Aug 20 nü Fazl Ali College nung commerce wing tenzüksü atema ki tasen renemer aliba ka semdanga liasü.

Ibaji semdang külen, FAC ketdangsur aser tesayurtem den mensem ka akadang, FAC nung commerce wing tenzüksü atema sorkar nungi ano temelaba agia mali, saka post tasen yanglutsü atemabo maparen tenzükogo aser iba sülen temelabaji agitsü, ta Minister Tongpang-i metetdaksüogo.

FAC nung commerce wing yaktatiba nung tenzükba aotsü asoshi akokba maparen ajak nung pai yariteptsü, ta ashi. Iba den külemi Amguri road nungi FAC college tashi koba lenmang kanga mejungi raksa lir, ibajia

tekaratiba nung repringteptsü, ta paisa shisem.

Mensem nungji FAC nung tang nungdakba, terenlok mapa den tang teinyakdak mapatem aser NAAC maparen dak sentakba onük balala nung sensaksama liasü. Sentong nung Mokokchung DC, Limawabang Jamir aser FAC vice principal, R. Arenla Aier natia shilem agia jembiba.

FAC nung commerce wing kibo renemogo aser taküm academic session nungibo tenzükba aotsü imlar saka tang tashi ano sorkar nungi temelaba agia mali. FAC ya Nagaland nung sorkar college rongnung tejentiba lir. Tang iba college nung Arts aser Science stream agütsür aser tsükdangradang majurura yakta commerce wing tenzüksü maparen inyakdar. FAC ya NAAC kübok B grade nung züngoka lir.

# Assam nung mozü shibelener nisung 4 apu



**Goalpara, August 20, 2021 (Agencies):** Assam kübok Goalpara district police-i Dudhnoi tesem nung mozü tetsür ka dena shibelener nisung pezü apu. Parnoki Yaba süngjang abenba atema apu. Goalpara district superintendent of police, VV Rakesh Reddy-i anir police telok kati mozü shibelenertem apu aser parnok ya Manipur nungi nisung 3 aser Meghalaya nungi ka lir. Goalpara Police-isa parnok ket nungi Bolero gari ana aser Rs 19 lakh ngutetogo.

"Manipur aser Meghalaya nungi telok ana tsüingda mozü shishilembatsü ta osang angazükba sülen onoki NH-17 nung tesem balala nung mita ata aser Dudhnoi nung parnok apu" ta Rakesh Reddy-i metetdaksü. "Parnok ket nungi Yaba süngjang 50,000, sen lakh 19 jungnüa aser Bolero gari ana puogo. Bolero gari kabo Manipur indang registration number lir" ta Reddy-isa ashi. Bolero gari ka indang totzü pongdang nung Yaba süngjangtem miima bena liasü

aser ano tanga Bolero gari nung senji miimba bena liasü, ta Goalpara SP-isa metetdaksü. "Iba mapang mozü shibelenertemi jena aotsü merang saka Anurag Sharma, DSP (HQ)-i anir police telok kati parnok apu" ta paisa shisem. Parnok dang asüingdangya asüandang mozü shilem ka Imphal nungi Guwahati ajanga bener aru aser iba sülen Meghalaya kübok West Garo Hills district-i bener aotsüba liasü, ta Goalpara SP-isa metetdaksü.

# Meghalaya sorkari Covid tenokdangba aika agiener

**Guwahati, August 20, 2021 (Agencies):** Meghalaya sorkari taruba hopta nungi public transport services aser saisapongba nung tenokdangba agüja aliba agientsü telemteba agiogo. "Ita asem ser tesadang ka shi lir sorkari tenokdangbatem agientsü lemtetogo" ta Meghalaya deputy chief minister Prestone Tynsong-i ashi.

State sorkarisa Meghalaya nung cinema halls aser public parks tanaben lapoktsü atema temelaba agütsüogogo, ta paisa shisem. Brihostibarnü Covid-19 indang tensa meyipa reprangshiba senden ka nung iba telemteba agi, ta Tynsong-isa shisem. "Hombar nungi sporting activities ajak tenzüksü akok. Cinema halls nung nisung

asemsü nungi ka amentsü atema lapoktsü. Ano, jackpot parlours aser public parks lapoktsü melaogo" ta paisa metetdaksü. Ajisüaka, item ajak ya sorkari standard operating procedure (SOP) sangdongba sülen anidaksü, ta Tynsong-isa ashi. Nija garitem nunga nisung asemsü nungi kasü mener senzüsü melar, ta paisa shisem.

# Manipur nung angometsüba ajanga Rs 100 crores kümzük: CM Biren Singh

**Imphal, August 20, 2021 (Agencies):** Taoba küm 4 ser tesadang tsüingda tangalen nungi ano bener aruba ajemba ajanga sorkari Rs 100 crores tema kümzükogogo, ta Manipur chief minister Biren Singh-i ashi. "Manipur-i tangalen nungi angomeric tonnes 20 bener aruba nungi metric tonnes 14

ajema aküm" ta pai ashi. Manipur nung küm shia angomeric tonnes 36,000 tashi metsüteter aser iba ajanga tangalen nungi bener aruba ajema aküm, ta Biren Singh-i metetdaksü. Manipur nung küm ka nung angomeric tonnes 52,000 shi achir. "Manipur sorkari state nung

ango teimba metsüsü atema angomeric tonnes den tesentaktep tajung yur inyaksangshir" ta chief minister-isa ashi. Manipur sorkari Sareng (Freshwater Catfish) metsüsü atema mapa tenzükogogo aser iba ajanga tangalen nungi Sareng bener aruba ajema akümtsü, ta Biren Singh-isa ashi



Mizoram kübok Indo-Myanmar arrotsü anasa aliba Lawngtlai district nung Assam Rifles aser Mizoram police yaritepa prangpong-injang aika ngutetba noksa nung angur. Osang tejangja angazükba sülen Zorinpui nung mapa lemzüka aliba Assam Rifles sepaitem aser Bungtlang nungi state police telok kati Hmawngbu yim anasa arem mita aodang prangpong-injangtem miima yua aliba ngutet. (Aizawl, August 20)

# Arunachal-i Assam den arrotsü angatetteptsü: CM Pema Khandu

**Itanagar, August 20, 2021 (Agencies):** Assam sorkar den arrotsü ken o angatetteptsü atema inyaker ta Arunachal Pradesh chief minister Pema Khandu-i ashi. Assam CM Himanta Biswa Sarma-i olemtep ajanga arrotsü ken o angatetteptsü molungogo ta CM Khandu-isa ashi. "State sorkari home minister Bamang Felix menden ser High-Power Committee ka tentetogo aser parnoki aiben olemtepogo" ta paisa ashi. Ano, August 26, 2021 nü High-Power Committee, Meghalaya MLA tem aser Assam den arrotsüa aliba district

tem nungi deputy commissioner tem senden ka amentsü sentong lir, Khandu-isa metetdaksü. Assam aser Arunachal Pradesh tsüingda arrotsü ken o ya okadak mesüi olemtep ajanga dang angatetteptsü, ta Arunachal Pradesh chief minister-isa ashi. Prime Minister Narendra Modi aser Union Home Minister Amit Shah nati ashiba ama Assam aser Arunachal Pradesh sorkartemi arrotsü ken o angatetteptsü telemteba agiogo ta Khandu-isa shisem. Arunachal Pradesh-i Assam den kilometer 730 tashi arrotsüa lir.

# Sep 10 nungi Meghalaya autumn session tenzüksü

**Guwahati, August 20, 2021 (Agencies):** September 10 nungi Meghalaya Legislative Assembly indang autumn session tenzüksü. Session ji September 10 nungi 17 tashi alitsü. Assembly Speaker Metbah Lyngdoh-i aniba Business Advisory Committee (BAC) ajanga yashi iba osang metetdakja liasü. September 10, 14 aser 17 nung government business aser September 13, 15 aser 16 nung

private members' business atema shimogo, ta Assembly ketdangsur kati ashi. Opposition-i session mapang talangba aginür anungji private member business anogotem ano teimba akümtsü ashitsü ta Leader of Opposition Mukul Sangma-i metetdaksüogogo. "Onoki private member business anogotem nung akokba tashi nübortem asoshi jembitsü" ta Mukul Sangma-i ashi.

# Assam sorkari Guwahati nung diesel amshiba bus melentsü



**Guwahati, August 20, 2021 (Agencies):** Assam sorkari Guwahati nung electricity aser CNG (Compressed Natural Gas) amshiba garitem ajanga diesel amshiba city bus melenzüksü. Hokolbarnü Assam cabinet-i electric bus 200 aser CNG bus 100 alizüksü telemteba agi aser item ajanga ASTC indang diesel amshiba city bus tem melenzüksü. Tanü Assam chief minister Himanta Biswa Sarma-i Guwahati nung iba osang metetdaksü. "ASTC-i diesel amshiba bus garitem mamshitsü. Onok indang alizüngji Guwahati nung diesel amshiba bus garitem melena electric aser CNG bus tem amshitsüba lir. Iba mapa ya küm ka tsüingda sorkari inyaksü" ta CM Sarma-i metetdaksü. "Onoki ita trok nungi küm ka tsüingda garitem melenzüksü" ta paisa shisem. Assam sorkari Guwahati nung diesel amshiba

bus melentsü Guwahati, August 20, 2021 (Agencies): Assam sorkari Guwahati nung electricity aser CNG (Compressed Natural Gas) amshiba garitem ajanga diesel amshiba city bus melenzüksü. Hokolbarnü Assam cabinet-i electric bus 200 aser CNG bus 100 alizüksü telemteba agi aser item ajanga ASTC indang diesel amshiba city bus tem melenzüksü. Tanü Assam chief minister Himanta Biswa Sarma-i Guwahati nung iba osang metetdaksü. "ASTC-i diesel amshiba bus garitem mamshitsü. Onok indang alizüngji Guwahati nung diesel amshiba bus garitem melena electric aser CNG bus tem amshitsüba lir. Iba mapa ya küm ka tsüingda sorkari inyaksü" ta CM Sarma-i metetdaksü. "Onoki ita trok nungi küm ka tsüingda garitem melenzüksü" ta paisa shisem.



## TIR YIMYIM YIMOBILEM (EDITORIAL)

DIMAPUR KÜPTOKNÜ, LUROI(AUGUST) 21, 2021

### Ozüng meyanglutetter !

**N**üortem aikati Nagaland timtemba jak ajaklenbo mereprangtettsüa akok saka tanü Nagaland kodamasü timtemba kaji ozüng yanglurtemi ozüng yangludak ozüng meyanglutettba timtem ya asütsü. Küm ishika jakdang Town aser Municipal Council (Urban Local Bodies) nung tetsürtem nem shilem ka lemsütsütsü ozüng latet saka mapa küma moutet agienba tanü ashi aji jembir. Aji oda, asen lima nungbo temzüng ozüng lateta akaba shitak mamshitetba dang masü saka tasena meyanglutet timtemba agi, asenok Independent angutsü melen anogo shia tangar küboki taluba taluba ludagi. Ibaji, Nagaland nungsa süaka, tangalenbo kangabo memetettsü saka Dimapur nung metetter aser ajangshir. Dimapur nung ILP amshitsü ozüng latet saka mamshitetter, kechiyong Naga nungertem dangbo tangar bendanglen nungi arua alirtem tesashiba aser teimba aser anogo shia züiner. Ano, ILP ozüng mamshitet lia Register of Indigenous Inhabitants of Nagaland (RIIN) ozüng lateta Nagaland nung alirtem rongnung sensopurtem o bendanger na bendangtsü asoshi apuso, saka ajia ozüng küma latettsü makoker, kechiyong senso purtemi bendanger tashi makoker. Iba tensa tia ya Nagaland nung alir Naga nunger senso purtem asoshi tebilemstü tuluka lir. Tang tangbo Nagaland asoshi rongsen poktetdakji Dimapur yimti ya dang lir, anungji Dimapur nung shishilembaba mapatem ya Naga nungertem keti marura, Naga nungerji pei lima nung kibur masü kilir dang asütsü. Tangbo alo beas nungi tenzüker jangotsü, ango an aser kisüjensüba oset cement tashi bendanger ket nung lir, anungji parnok jenzang kwi tunüdir atutsü aser aji asenoki agütsütsü. Shitakba agi bendangertem aruba agi asenok ajangzüktsüla saka asenokbo meyiper parnokang ajangzüktdaktsür. Joko, Naga nungertemang bendanger kidang kinüker kümogo aser bendanger mapa nung asenokang ayanger. Iba jagi asenok temulung sür alir. Aji oda, Dimapur nung ILP aser RIIN ozüng mapa küma mamshidaktsünüba bendanger telok tuluka lir. Parnok ket nung nisung tsübudaktsütsü aser mesüzüktsü tashi ajak lir. Parnokji Nagaland kümer tesülen arurtem, anungji Nagaland senso mekümtettsü saka asenoki memeteti pibo asenok den kasasa senso kümogo. Item bendangertem aika Dimapur nung kiojen aser ali kimong aika lir. Shitakba kodang ILP aser RIIN ozüng mapa küma amshitsü tenzükdir, itemji ozüngi memelaba rongsen kümadoktsü. Ibaji parnok asoshi tebilemstü tulu, anungji parnok item ozüngtemji tashi ajak amshia nokdangtsü meranger. Atangji, Naga nunger masüba nüortema aika, shirnok Nagaland state makümdangyongi arua liasü, parnok aser parnok dak nungi jakzükba purtembo Nagaland senso asütsü, anungji parnok jagibo Nagaland nung ali senmang amangtsü akoktsü. Item nemji Permanent Residential Certificate agütsütsü. Item dakji alaka bendanger shinga, arua ayanga liaka, Nagaland nung ali kibur küma pei meyong kiojen yanglua melitettsü. Tekümdangtsü kaji, bendanger aikati Nagaland senso akümtsü atema Naga tsür agir aser la tenüng nung ali kimong alia kiojen yanglur. Ajia junger, tetsür kiba kiyii aotsübaji menokdang saka tetsür la tenüng nung amanglemba ali kimong aser kiojenji kinungbo indangji mekümtettsü. Bendangertemibo sen bushitsü lenmang meteta lir aser mapaa meranga inyaker, anungji parnok ket nungbo senotsü lir. Parnok asoshi sen crore kaji sen masü, saka iba sen jagi asenok meyong ali kimongbo tuluka alitettsü. Iba ama tensa tia ka nung, Nagaland tatar senden nung tatartemi ozüng meyanglutetter aser nüortemia parnok meketa kechi atalokar memeteti, asenokbo ita sen tilaka anguba agi aser relief jang agi tebok sünga litetba agi tenük sünger, kecha shisabolu maka Nagaland politics aser Nagaland election indangang tuluka ama jembia kazüteper. Asenok ya alemli Riv Van Winkle tangari agütsüba yi ishika jemer küm metsü süngmanga oa mejangba mesüka lir. Asenok tenük longshir aser temang arakzur dang ashi, tekolok aser temulungjangbo shitak mapa meinyaker amai kümogo. Pei lima aser pei chirnudem asoshi ozüng melatettetba aser mamshitetba nüortemji tasü den kasa lir. Parnokji shia arua saktsüla aser bendanger tsübuba agi kima yimdong nunga sadema mesenzütettsüa makümdang, kechi ozüng latettsü tim, aji lateta mapa küma amshitsüla aser Nagaland ya tangar keti moudaktsüi Naga nunger ket nung ayutsüla. Aji tanü taintemi meinyaktetra lanurtemi inyaktsüla, kechiyong tarutsü Naga limaji parnok aser parnok chirnurtem meyong asütsü.

## OLEMSABANG

### Arok Tenzükba Mapa aser Temeshi Laishiba

~ Dr. Zülü Jamir (Osang zülur)

(Yashi adok nungi...)

Anungji Lai ratet aser Laishiba tensa timbaka tebur yimden yimli ama bener aruba angur. Yongji Tejen Lai putu nung putir sobo solemji Chuba dang nungi tera tekübokba nung amshia aru. Tejen Lai putu tensaji balaka liasü, saka tanü meimchir kangasa renloka aoba putu nung Lai O teratetji ajak den sütepba agütsütsüla. Tasen Lai mapang nung Yisü nütsüngtemi tentetba arogoji amangbapur tila-tulu, takar-sensaker, aser tashir-mashir kecha tebandang makai arok külemi longjemer Tsüngrem külema aru. Saka 4th century nungi Rom yimli Constantine yimsüsüba nung Khristan yimsü Chuba yimli madak tamangba yimsü agizüka, tamangba yimsü inyakyim melenshia arudang arogo nung tebur yimli yimsüsüba amenoka tebilemstü jendi ajurua aru. Iba sülen alima ajunga Colonial yimsüsüba nungi missionarytem iba pangdak külisüba nung Arogo tenteta aruba ajanga Khristan tamangba yimsüji iba yimya nungji sangdong. Asen Naga lima nunga tebur yimli yimsüsüba nung missionarytemi arogo tenzüka aruba angur. Ya tanü putu tensa nungbo Khrista külisüba nung tetsüktdaktsü ta ajiteter. Arogo nung lenisüba menden ana lir: Mezüngbuba, tebur lenisüba. Iba lenisüba nung pangdak, temzüng aser tashi amshia yimsüsüa arur. Aiben iba yimsüsüba nung rasa-ralema makai ajungben telemtetba agiba ajanga timtem ajurur. Tanabuba nung, tetsür lenisüba nung tetsürtemi ajak den amalitepba, asüngdangtepba, tzüzüng ozüng sashirabo mamshii ajak den liro medema inyaka aotsü meranger. Tetsür lenisübaji jungaka aikati nenemshinema anidaker. Tetsür lenisübaji tetangshi süaka aika tetsürji ta sür temulung sadoka manidaker. Tenzükba nung temelenshi atema lokti nung tetsür-tebur tsüngta bendangbenchi madoktdaktsütsüi khuret ajak arok lemsatepba inyaka ora, lokti nung sempet balala ajakji meyokteper temelenshi tulu adoktsü.

Tasembuba o jembir Dr. Narola McFayden-i "Co-pastor" ya asen tendak nungja aser inyakyim tasen ka lir iba indang tanga lima nung inyaka aor aji jembir. Iba tenzüka mapa ya temesüng (Asia nunga aika nung) lima nungbo kangasa takok ngua Apuani (Couples) ajanga Pastoral ministry külemi inyaka arur. Christian ministry ya asen inyaknuba wadang ka masü, saka Khrista asoshi taküm aser sempet ajak bendanga agüja inyakba wadang ka lir. Christian ministry nung Khristaji tekolak aser kibur. Kibungbo aser kinungtsü tenaprongla zünger tenzüksü tajaba tejangja kara arogoi kasa ordain sütsüba lir. Co-pastor mapa nung kinungbo aser kinungtsü, ka temaba, ka tekübokba ta mali, kasa dang. Ita sena pa nem ya, la nem ya ta tebandang mali ita sen ka dang "Co-pastor itasen" ta sür tangar single pastor nem 1000 ka agütsüra, co-pastor nem 1500 ta agüja külemi longjemer khuret aser maangka ajak kasa lemsatepa maparen ajak takok ngua bener aor. Pulpit ministry nungi tenzüker, arogo ketdangsuba, kibok kitem, baptism, senden balala aser kir benjong, item amala sentong ajak nung melentepba shilem agiba ajanga maparen balala nung takok ngua aser temoatsü tulu ngua inyakba kuli lir.

Co-pastor inyakyim ya Laishiba tamentadak tejangja lir, tongtipangsa Tasen Lai nung kinungbo aser kinungtsü, tat. agi Priscilla aser Aquila, tena kati ka metoktsütepi tenzüka nung koda tashi ita nokdak, yamaji tanü asen ABAM kübok arogoitem nung kinungtsü aser kinungbo tazüngba aser tanela khuret sütepba bener otettsüsa lira, pastoral ministry nung co-pastor inyakyim nung külemi yaritepba inyakba ajanga temelenshi tulu adoktsü teimla angur.

Tezülur tayongzükba

Tanü asen tendak tenzüka mapa nung tebilemstü tulutibaji, Khrista yimsü aser yimli tiyongtsü masü, saka nisüng tangatetba aser sobaliba mezüng sürang Khrista aniokba ajanga tebilemstü aika ajurur. Laishiba tesayuba küboki mitettsüsa asen sobaliba tarensen ajanga asenok alenra, tenzüka nung tebilemstü tulutibaji ibai alitsü.


Mungdang kübok Arogoitem tejen putu yimya (traditional mindset) nung aruba; Tekülem yimya, tenzüker shimba yimya aser nisüng tsüngda telemsa aliba ajanga tenzüka wadang nung tebilemstü jendi ajurur. Tongtipangsa tanü asen atep nung para-churches aser ministry aika züinba asenoki angur. Lanurtem aser aturar kibongtem aika item ministry nung yakyaka inyakba angur. Arogoitem aser item tenyaba mapa ajak nung Lai o ka dang sayur aser tekülem ken kasa atener. Süra kechiba para-churches-i aser ministry-i aotsü jangrar! Ya Arogoitem ajak asoshi tebilemdangtsü kangasa tongtipang tensa ka lir.

Arogoitem aika nung tanu tekülemer noklang shilem nung 70-80% bo tetsür aser tanurtem lir. Arogo nung tongtipang meeting nungbo telemtetba ajak tebur teloki agir, saka teinyakertembo tetsüri teimba inyaker. Iba ya arogoitem asoshi tebilemdangtsü tulu ka lir.

Tatem nung, Khristan yimsü ya asen lima nung America nungi Baptist tamang bener arua, iba yimsü ya keta sena renloka arur. Co-pastor mapaji America lima aser tanga lima nung takok ngua inyakteter süra, asen lima nunga iba ministry ya takok nung aotsü teimla tulu lir. Asen tendak koba sobaliba aser tzüzüng-ozüng ajanga tanela mapa renloka motetti amoksepba ayur, item talenba ajak ya sala yoker Khristar wadang renloka inyaka aotsü mechi, ajak nung tetsür-tebur ta tebandang mali ajaki arok shilem angateta amalitepa inyaktsü nukjidong asütsüla. 2022 jubilee sülen Co-pastor mapa tasen ya arogoitemi inyaktsü ta imlar.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## November ita nung 'Journey with Jesus' film sayatsü



**August 20, 2021:** Oak Cliff Bible Fellowship nung Pastor, Tony Evans aser par jala ana-Chrystal Evans Hurst aser Priscilla Shirer nungeri Israel semdangba indang documentary film "Journey with Jesus" November ita nung sayatsü; iba film ya aonung asem tashi nung sayatsü.

Documentary film nung par kibongi Temeshi lima nung Yisu Khrista alima nung aliba mapang nung Pai ministry mapa inyakba asadanger.

Iba film trailer sayaba sülen Evans-i social media ajanga, "Kü indang film tasenba

'Journey With Jesus' trailer sayaba atema pelar. Iba film ya November 15, 16 aser 17 anogotem nung sayatsü," ta metetdaksü

"Ni aser ozü jalatemi asen Kümtetdakba tsüngsü nung jajaba aser Temeshi lima nung tesüingmangtsü aika ajangshiba repringang," ta pastor Evans-i metetdaksü.

"Journey with Jesus" film ya Israel nung tangok. Iba film trailer nung Evans'er kibongi Galilee tziyim repringang, Holy Sepulcher Tenla ki semdangba aser pai lokti ka matsüngdang sayatsüngiba densema lir.

"Galilee Tziyim penzüa repringang mapang nung atangji O agi shi akümba tepor ajung kü melungjang nung nenshia metetdaksü," ta Shirer-i ashi.

"'Journey with Jesus' film repringang ajanga nisung aika kongshitsü, kechiyong iba film ajang Yisu Khrista otsü taliba asentenshia metettsü aser tamang jenjang aintsü," ta laisa ashi.

'Journey with Jesus' film nung Yisu taküm ailidang Pai semdangba tesem balala aser Yisu asoba nungi tenzüka Pa tasü nungi shia aruba tashi nung tatalokba otsütem densema lir. Evans, Hurst aser Shirer nungeri temeshi lima semdangba sülen parnoki ajangshiba nungi tangazüktsü lesson aika angutsü.

Evans-i sangdong ka ajanga, "Tatem maka temelenshi adokba Yisui semdangba tesemtem screen ajang nisungtem den lemsatepbaji puti otsü asütsüsa maongka tajung ka lir," ta ashi.

Oak Cliff Bible Fellowship nung senior pastor, Evans-i, "Yisu Khrista tashiji nüburtem matsüngdang sayatsü aser timtem tensa mapang nung süaka nisungtemi Pa nem tenüngsang agütsütettsü, ta ni imlar. Iba film repringang ajang Pa sentsüwangshi atema Pa nem tenüngsang agütsütsü aser tepela nung Kibuba tenzütsü," ta metetdaksü.

## Afghan refugees agizüktsü atema UK Arogotem renema lir

**August 20, 2021:** Afghan refugee tem agizüktsü aser UK nung jenoka taküm tasen tenzükdaksütsü atema UK nung Arogotem renema lir.

Welcome Churches network-i nüburtem dang, Afghanistan nungi kibongtem UK-i anir arua jenokdaksütsü atema Emergency Afghan Fund atema tenla agüjang, ta mepishio.

Iba Fund atema inyaker rongnung ka- Dr Krish Kandiah-i, "Afghan refugee tem nungdak perija parnok dang Khrista temeim sayatsü atema UK nung aliba Arogotemi inyaker," ta metetdaksü.

"Rara aliba tesem (Afghanistan) nung kibongtemi parnoki akokba tashi dang bener iba linük toktsür jenogo aser parnok UK telungi aйдang parnoki asenok dang nungi temeim nungdaksü," ta paisa metetdaksü.

UK nung Arogotemi Afghanistan refugee tem yaritsü atema lenmang asem lir, ta

metetdakja pai, "Mezüngbuba nung parnok atema sarasademjang, tanabuba nung Welcome Churches network nung shilem agiang, koba ajang Arogotem renema litettsü, aser tasembuba nung nungdakbapurtem yaritsü atema tenla agüjang," ta metetdaksü.

Chelmsford nung aliba Arogoia, Afghan refugees yaritsü atema parnok kübok Arogotem ajak renema lir, ta metetdaksü.

Arogoi ashiba agi, 2015 küm nungi tenzüka tang tashi nung parnoki Syria nungi refugees aser Afghan nunger oshi meyipzükertem kibong 250 jenokdakja yariogo.

Tawa Taliban teloki Afghanistan linük agiba sülen nisung aikati iba linük toktsür tanga linük balala nung jenoka alitsü bilemdar.

Chelmsford nung tongti putir, Guli Francis-Dehqani aser Arogo nung Refugee Coordinator, Rev. Canon Gareth Jones nati nüburtem

dang Afghanistan atema sarasademtsüba den külemi iba linük nung timtemertem ajak asoshi sarasademjang, ta mepishia metetdaksüogo.

Tenati sangdong ka ajang, "TV screens nung asenoki Afghanistan nung tensa raksar aliba angur aser nüburtem timtembaji asenoki masadanteter. Tang ama tensa ka nung nisung aikati parnok yaritsü atema shisadangdar," ta metetdaksü.

"Khrista tenüng nung Arogoi timtemertem aser reshikangshi nung alirtem yaritsü aser tang ama timtem tensa ka nung Khrista aliba jungkai adokdaksütsü atema inyaktüsü. East London aser Essex kübok ozü Arogotem ajaki refugee tem yaritsü atema renema lir," ta tenatisa metetdaksü.

"Ozü Refugee Engagement Team renema lir aser taruba itatem aser kümtem nung Afghan refugee tem agizükba den parnok yaritsü atema Arogotem renema lir," ta tenati metetdaksü.

## ANOGO ABEN TSÜNGREM DEN

### TEBANG-TEMELI SOTANG

**"Shibaisa pei tebang aser temeli sotdir, timtem nungi pei taküm soter." S.Shin 21:23**

Alima nung nisung shia sempet balala keter asor. Taküm ka asoshi sempet tamajung rongnung tebang aser temeli mazüokba yimya ya ka lir.

Kodang kiyonger mesüra külem tenzüker rongnung ibala yimya mazüoktetba nisung ka lidir teti nung aikati pa/la alidak O mashi mejembir.

Ken mapang ka nisung kati kar anenma pa tebang-temeli mazüoktetba "tayang küpzükbaji tanang" (Revenge is so sweet) ta ashiba ajang lokti nung rongrong tulu adoka hopta ana shi school nung class maka iba O dakji soter atsütepa arur, tatemsa yimten yimsüsür ajang metbüba dang student rongnung kar dak dang timtem atalokra pai abentsü ta tenangzüktetpba agia tembangba ajangshia liasü.

Nisungba jagi ibala ama O ji tebang-temeli nungi kazüka meyok asübo iba amaji timtem majurula, saka pa tebang nungi lijak jang tesashi mesükba O yokba ajang rongrong tuluji adoktsüsa kümdaksü.

Amangbaputem, asen tebang-temeli nungi adokba O temji ajaki agizüktsüsa Tsüngrem O-i ashiba ama "pei tebang aser temeli sotdi", tajangzük makaba otem jembiba nungi kümdanga meita lidi, süra iba jagi asen taküm timtem jenti nungi kümzüka litettsü.

### SARASADEM

Temeimba Tsüngrem, kü tebang aser temeli mazüokba ajang tangar jashidaksüba tai nangzüker. Nai taochi sayuangma. Amen

## World Evangelical Alliance-i Afghanistan atema sarasademtsü mepishir

**August 20, 2021:** August 16, 12,000 shi dang lir, ajisüaka 2021 nü World Evangelical Alliance (WEA) General Secretary, Dr. Thomas Schirramcher-i Khristantem dang Afghanistan atema sarasademjang, ta mepishia metetdaksüogo, ta International Christian Concern-i metetdaksü.

Schirmacher-i sangdong ka ajang Khristantem dang, talisa Taliban yimsüsüba kübok reshikangshi ajangshia aliba Afghan Khristantem atema sarasademjang, ta mepishi.

"Tawa Afghanistan nung tatalokbatem osang angashia mepelar aser Taliban yimsüsüba kübok temsüa maliba nisungtem atema onoki tebilemtsü katsür. Talisa Khristantem densema minorities-i timtem ajangshiba osang junga mangashir. Tesüiba küm 20 tashi parnok reshikangshi tia nung lia aruogo aser tang (Taliban kübok) parnok taliba timtemtsü," ta pai metetdaksü.

Afghanistan nung Khristantemji timbaka Islam yimsü toktsür Khristan yimsü agizükertem lir. Iba linük nung tang Khristan nütsüng 8,000-

12,000 shi dang lir, ajisüaka 2021 nü World Evangelical Alliance (WEA) General Secretary, Dr. Thomas Schirramcher-i Khristantem dang Afghanistan atema sarasademjang, ta mepishia metetdaksüogo, ta International Christian Concern-i metetdaksü.

Islam yimsü toktsür Khristan yimsü agizükertemji Islam yimsü alia amangertemi reshikangshiba dang masü saka loktiliba nunga parnok anema inyaker.

Afghanistan nungbo Islam yimsü toktsübaji maaksü mapa ka lir aser parnok tanga yimsü dangi meyipba metetra temerenshi tulu angur mesüra tepseta indoker.

Taliban tangatetba kübok Afghanistan ya Muslim linük ka lir, anungji Muslim nunger masüba nisungtemi Afghanistan toktsür aotsüla, mesüra 'seond class citizens' ama alitsüla.

Tongti putir, Schirmacher-i, Taliban teloki Afghan nunger Khristantemji mamangertem ama züngshitsüa akok aser tepseta indoktsüa akok, ta metetdaksü.

Open Doors-i ashiba agi, tang alima nung Khristantem tamajungtiba reshikangshiba linük 50 rongnung Afghanistan ya tanabuba jenjang nung lir.





New Delhi, August 20, 2021: Taoba mapang Ato kilonser, Rajiv Gandhi asoba anogomong nung Parliament House nung Union Defence Minister Rajnath Singh, Congress Tir, Sonia Gandhi aser tangartemi asür nem akhüm agütsüba sülen tangokba noksa nung angur.

### Jaishankar aser Blinken nati Afghanistan tensa atema jembia

New Delhi, August 20 (Agencies): Hopta ka tsüingda tang agi tanabenbuba US Secretary of State, Antony Blinken aser India External Affairs Minister, S Jaishankar nati tang Afghanistan tensa atema jembio, aser iba onük atema linük anati maneni amalitepa inyaktsü bangjemogo, ta ketdangsertem osang ka ajanga metetdaksü. US sepaitemi Afghanistan toktsür aoba sülen hopta ishika tsüingda Taliban teloki Afghanistan agiogo aser tang iba linük nung tensa mejungi lir. Mongolbarnü India-ia Kabul nungi ambassador, Rudrendra Tandon aser Indian Embassy nung inyakertem IAF tayimtsü ka nung anir aruogo.

Brihostibarnü Blinken-i phone ajanga Jaishankar den Afghanistan tensa atema jembio, ta US State Department otongdar, Ned Price-i metetdaksü. "Secretary Blinken aser Minister Jaishankar nati Afghanistan atema jembia aser maneni linük anati iba onük atema amalitepa inyaktsü melungogo," ta Price-i metetdaksü. Taoba Hombarnüa Blinken aser Jaishankar nati rara aliba linük Afghanistan tensa atema jembia liasü, aser iba mapang nungji Jaishankar-i Kabul airport nung service alitsüji kanga rongdak nüngdak, ta metetdakja liasü. Brihostibarnü UN Security Council nung osangbenertem

den jembidang Jaishankar-i, Afghanistan nungi India nung anir arutsü atema India sorkari international partners, talisa US den jembia inyakdar, ta metetdaksü. Tang Afghanistan linük Taliba küboki aitogo, anungji kechi inyaktsüla?, ta asüingdangba langzüdang Jaishankar-i, "Tang tongtibangtiba mapaji sensotem iba linük nungjagi anitetsü atema lir. India-i pei sensotem atema inyaker, yamaji tanga linüktemia pepei linük atema inyakdar," ta metetdaksü. "Iba atemaji onoki International partners den inyaker, talisa US den inyaker, kechiyong parnoki (Kabul) airport azüokdar," ta paisa shisem.

### Chhattisgarh nung Maoists teloki amakdang ITBP officer ana asü

New Delhi, August 20 (Agencies): Hokolbarnü Chhattisgarh kübok Narayanpur district nung Maoists telungpurtemi amakdang assistant commandant ka densema Indo-Tibetan Border Police (ITBP) sepai ana süogo, ta police ketdangser kati metetdaksü. Osangbener den jembidang Inspector General of Police (Bastar range), Sundarraj P-i, nikonkdang 12:10 ako meta ITBP 45th Battalion indang Kademeta camp anasa Maoists

telungpurtemi sepaitem amakdang Assistant Commandant, Sudhakar Shinde densema ITBP sepai ama asü, ta metetdaksü. "Telungpurtemi injang amshia amakdang Assistant Commandant Sudhakar Shinde aser Assistant Sub Inspector (ASI) Gurmukh Singh nati takümtenla agütsü; tenaprongla ya ITBP 45th battalion nungi lir," ta Sundarraj P-i metetdaksü. ITBP sepaitem amakba sülen telungpurtemi AK-47

prangpong ka, bullet-proof jacket ana aser sepaitem indang wireless set ka auyar ajen, ta IG Bastar-isa metetdaksü. Ano külen tanga osang ka nung, Maoists asem- Sitanadi LOS (local organisation squad) züngsem, Ramesh Madkam (Jeevan), CNM (Chetna Natya Manch) 'commander' Kawasi Joga aser militia platoon züngsem, Doodhi Bhima nungeri Sukma district nung police matsüingdangi arua surrender süogo, ta ketdangser kati metetdaksü.

### Taliban teloki Indian Consulates raksatsü aser documents bener ao

New Delhi, Luroi/August 20 (Agencies): Anogo ana tejaklen Taliban teloki tang Afghanistan kübok Kandahar aser Herat yimti na nung shibanga aliba Indian Consulates mita oa liasü, ta osang ka ajanga metetdaksü. Security osang ka ajanga ashiba agi, Taliban teloki Indian Consulates ana nung anena aliba garitem aser documents kar bener ao.

liasü. Parnoki item tesem mita ao aser embassy anaprongla nungi gari aser documents kar bener ogo," ta metetdaksü. Afghanistan nung tensa tamajungba akümba sülen Mongolbarnü India-i Embassy nung inyakertem Indian Air Force C-17 tayimtsü ajanga anir aru. Kabul airport nung ITBP sepaitem densema India nung 120 anir aruogo. Cabinet Committee on Security (CCS) senden nunga tanüingba India nung ajak Afghanistan nungi anir arutsü atema o lemtepa liasü. Tang Taliban teloki taoba mapang NATO aser US sepaitem den amalitepa inyakertem bushidar, ta UN document ka ajanga metetdaksüogo.

Afghanistan nung India nung consulates pezü lir, aser itemji Kandahar, Herat, Mazar-e-Sharif, aser Jalalabad yimtitem nung lir, ajisüka August 15 nü Taliban teloki iba linük agiba sülen Indian Consulates ajak shibanga liasü. India sorkar ketdangser kati, "Onoki yamai ataloktsü ta bilema

### India nung ano Covid agi nisung 540 süogo

New Delhi, August 20 (Agencies): India nung ano nisung 36,571 dak coronavirus putet aser iba tashidak agi shiranger 540 süogo, ta Hokolbarnü Union Health Ministry-i metetdaksü. Tang tashi nung India nung nisung ajak senteper 3,23,58,829 dak coronavirus putetogo aser tang tashi nung iba tashidak agi shiranga asür 4,33,589 jungogo. Tang India nung coronavirus agi teshirangdakpur 3,63,605 dang kümogo, aser ibaji coronavirus caseload nungi

shilem 1.12 dang lir. Tesüiba ghonda 24 tsüingda shiranger 36,571 anepogo, ta health ministry-isa metetdaksü. Brihostibarnü samples 18,86,271 tendnga liasü aser tang tashi nung samples ajak senteper 50,26,99,702 tendangogo, ta ICMR-i metetdaksü. Taküm January ita nung India nung coronavirus vaccination tenzükba sülen nungi tang tashi nung covid vaccine dose crore 57.22 agütsüogo.



August 20, 2021 nü New York nung India External Affairs Minister, Dr. S. Jaishankar mendenbuba ser UN Security Council senden amendang tangokba noksa nung angur.

### PM Modi aser Rahul densema lenirtemi Rajiv Gandhi nem akhüm agütsü

New Delhi, August 20 (Agencies): Taoba mapang Ato kilonser, Rajiv Gandhi sor küm 77 ajungba anogomong (August 20) nung Ato kilonser, Narendra Modi aser Congress lenir, Rahul Gandhi na densema yimtenren lenirtemi asür nem akhüm agütsüogo. Modi-i twitter ajanga, "Taoba mapang Ato kilonser, Rajiv Gandhi asoba anogomong nung pa nem akhüm agütsür," ta metetdaksü. Rahul Gandhi-ia pa tebu memorial, Veer Bhumi nung narö tokja asür nem akhüm agütsü. Pa den party lenirtem-Pawan Kumar Bansal, K C Venugopal aser Indian Youth

Congress Tir, Srinivas B V nungera densema liasü. Rahul Gandhi-i Facebook post ka ajanga tebuti jembiba o "Secular India ajanga dang India taküm alitsü" ta lemsatap. Rajiv Gandhi ya 1944 küm August 20 nü aso aser 1984 küm October ita nung pa Ato kilonser aküm aser India nung Ato kilonser tanubotisinggi pa liasü. Pa 1989 küm December 2 tashi Ato kilonser inyak aser 1991 küm May ita nung Tamil Nadu nung election sentong ka nung adenba mapang Liberation Tigers of Tamil Eelam (LTTE) -i bomb amshia pa pokseta südaksü.



August 20, 2021 nü Malkangiri district nung Biju Swasthya Kalyan Yojana (BSKY) tenzükba sentong nung Odisha Chief Minister, Naveen Patnaik-i Bonda tribal tsür ka nem iba scheme indang smart health card agütsüba noksa nung angur.



Russia yimtiba, Moscow nung Russia Tir Vladimir Putin-i August 20, 2021 nü German Chancellor Angela Merkel agizükba mapang tangokba noksa ka yangi angur. Merkel ya Tir Putin den ken o balala jembishinütsü atema Moscow nung oa lir, koba lai ketdangsür ka ama Russia semdangba tatemang alitsü, kechiaser lai küm 16 jungnüa yimsü asüba sülen taruba ita menden azungtsütsü renemshir. Germany nung election ya September 26 nung agitsü sentong lir.

### Taliban teloki Afghanistan nung ki sema nisung bushir: UN

**Geneva, Luroi/August 20 (Agencies):** NATO sepai aser taoba Afghan sorkar atema inyakba nisungtem Taliban teloki bushi tenzükogo, ta UN atema renema aliba document ka ajanga ashi.

Telungpur tem yagi par nukjidong ataloktsü asoshi ki sema aor aser kinungertem amokmerener, ta ashi.

Islam yimsü akhanga amshiba telok yagi kanga kera Afghanistan amokbang aser iba sülen nüburtem dang parnoki mangyangba malitsü ta nangzuka lir.

Saka parnoki nangzükba aser inyakba na tsungta tepila tulu lir, ta tetsübu aiter.

Iba tekumdangtsü osang ya temai madokdaksüla document ka ama RHIPTO Norwegian Center for Global Analyses ajanga renem, shirnoki UN nem itdangiterba maparen agütsür.

"Tang Taliban-i tenük yokba nisung aika lir aser lendong tejangia lir," ta iba telok nung tekolakba, Christian Nellesmann-i ashi.

"Par sasa bendanga magütsüra, Taliban-i parnok tenüng nung kinungertem pua merenshitsu, asungdangyatsü aser temerenshi agütsütsü ta zülua lir."

Taliban indang blacklist nung alirtem ya lendong tulu nung lir aser nisung aika tepsettsü akok, ta pai tekumdangtsü ashi.

Bendanger temi Afghanistan nungi pei nüburtem anizüker aotsü asoshi maneni inyaker. Taoba anogo pongu tsungta Kabul airport nungi nisung

18,000 dak tema anizüker ogo, ta NATO ketdangsür kati Hokulbarnü ashi.

Ano nisung 6,000 shi Brehostibar aonung mesüra Hokulbar anepdang anizüker aotsü lir, aser item rongnung taoba mapang bendanger sepaitem asoshi oshi meyipzüksürtem dena lir.

Hopta tatemlen anasü agi timba anizüker aotsü sentong lir, ta ketdangsüri ashi.

Airport tezülen tensa mejungi rongrongshirong agi sünger lir. Afghan nungertem jena aotsü merangba Taliban temi nokdanga arur aser video ka nung tanur ka US sepai nem amoktsüba nguogo.

US sepaitem aser embassy nung inyakerem anizüker aoba maparen atema Tir Joe Biden-i Hokulbarnü jembitsu amanger. Afghanistan nungi US sepaitem anizüker aoba ya maksü ka lir, ta Biden anemertemi ashir.

Kasa mapang Taliban anema yimti tem nung longkak aitba timba akumer. Linük yimtiba, Kabul nung longkak aiter temi linük indang nisan ayiptena liasü aser Asadabad nungbo longkak aiter asü-amaba osang lir.

Tang Taliban kabu nung US-i yangluba armoured vehicle meyirijang aika, tayimtsü 30-40 shi aser prangbong tila aika lir, ta US ketdangsürtemi ashi.

Bendanger sepaitem linük nungi ainshiba mapang Taliban teloki Deobarn Kabul amokbanga liasü.

US-i aniba sepaitemi Afghanistan nungi Taliban

yimsüsüba atsüngdoker küm 20 lir parnok tanaben yimsü asütsü meyipa shilanger alitsü.

Parnoki taoba mapang yimsü asüdüng yimjak nung nisung tepseta amshi aser tetsürtem mapa inyakba tesemi arutsü memelai liasü.

Saka parnoki Afghanistan tanaben amokbangba sülen osangbener senden nung mezüng jembiba mapang Islamic law talenba kübok tetsürtem temeden wazüka ayutsü aser akumtsübuttsü shia liasü.

Taliban-i tetsürtem nem tashiyim agi burka (tejak aser temang ajunga nembangba sü ka) magidaksütsü nangzük, ta ashir. Iba melen hijab mesüra tekolak nung mesüba sü ka amshidaksütsü, ta ashi.

Parnokisa linük telungzük aser tema nung tsükchir maginer aser taoba mapang security forces nung inyaka alirtem aser bendanger sepai asoshi inyaker nem tatok agütsütsü, ta shia lir.

Ajisüaka linük balala aser Afghan nunger aikati yangji temolung melemteter.

Telungpur temi parnok ya linük balala nem chichiba yimsüsür ka ama agizükdaksüner, aser UN asoshi tajangzükji ibajidang lir, ta UN tekolakba, Antonio Guterres-i ashi.

Taliban telok melenshir amai bilemer asü, ta asungdangba mapang, "Memelenshi," ta Tir Biden-i langzü aser linük balalai parnok agizütsü asoshi par dak keta lir, ta ashi.



Spain indang Canary Islands nungi kilometer 220 (mile 135) pilar Atlantic Ocean nung rong ka mükepokba sülen iba lendong nung nisung 50 dak tema sür alitsü, ta ashir. Brehostibarnü atalokba lendong nungya arishi küm 30 tain tetsür ka kisüng takum kumzük, ta Spain indang Maritime Rescue Service ajanga ashi. Iba rong nungya migrant aser refugee 53 mener taoba hopta Africa nungi ayameso, ta ashir.

### Sri Lanka nung COVID-19 mechi anogo ter lockdown tenzükter

**Colombo, Luroi/August 20 (Agencies):** Sri Lanka nung coronavirus tashidak agi menepba aser nisung asüba ajanga mozüki, leper aser nisung tasümgang aremba tesem sünga akumba mechi iba asetkong linük nung Hokulbar aonung nungi tenzuka anogo ter atema lockdown sangdongogo.

Bodhbarnü iba tashidak ajanga nisung 187 asüba aser cases tasen 3,793 jangjatetba sülen medical tsütsü mongintemi ashiba angatsüsa akum.

Taoba küm iba tashidak tenzükba sülen Sri Lanka nung COVID-19 agi nisung 372,079 menepogo aser nisung 6,604 süngo. Ajisüaka iba tashidak agi meneper ya anasü agi timba alitsü südi, ta health tsütsü mongintemi ashir.

"Linük ajunga nung Lockdown ya taonung (August 20, 2021) 10:00 ako nungi Hombar (August 30, 2021) tashi alitsü. Tongtipang services tem akhi ama alitsü," ta Health Minister Keheliya Rambukwella-i Twitter ajanga ashi.

Tir Gotabaya Rajapaksa-i presidential task force on coronavirus indang zümgsemtem den ajurutep aser linük den Hokulbar aonung jembitsu imlar.

Junior minister for health, Channa Jayasumana ajanga coronavirus Delta variant ya bomb tesashi ka lir, koba Colombo nung pokogo aser tesem ajaklen prokshir, ta ashi.

Iba tashidak azioktsü asoshi tangsa linük nung lockdown

benokang, ta medical nung inyaker, tamangba yimsü lenir, yimten yimsüsür aser shishilembartemi ajungshia liasü.

Mozüki aser nisung tasümgang ayudak tesemtem sünga akumer, anungji lockdown benoktsüla, ta doctor aser trade union temi sorkar dang aiben ajungshia aru.

Saka rongsenketzung mejungi aliba ajanga sorkari iba mera agitsü atsülang.

Anogoshi iba tashidak menatepba ya ita ka tsungta anasü agi timba kuma anogo ka nung nisung 3,897 dak COVID-19 puteta arur, ta Reuters Global COVID tracker ajanga ashi.

Nütsüng yongsük million 21 aliba linük nungya mozüki sünga COVID-19 agi shirangertem lir, kong kanga kera menatepa aoba Delta variant tali kumogo.

Tenokdangba aika benoka lir, aser item rongnung school, gym aser swimming pool tem shibanga lir aser kiyimba aser kenten menu nokdanga lir. Ketdangsürtemi Hombar nungi tenzuka aonung 10:00 ako nungi anepdang 4:00 ako tashi curfew benoka lir.

Sri Lanka nütsüng yongsük shilem pezü kuma lemsar shilem ka nem COVID-19 mozü agütsüogo, aser iba mozü ya timba China indang Sinopharm vaccine alitsü.

Ano Sri Lanka nung Pfizer, Moderna, AstraZeneca aser Russia indang Sputnik V amshitsu mela lir.

### Malaysia PM inyaksü Ismail Sabri shimogo



Ismail Sabri

2018 küm election nung tsükdakja liasü.

Ismail busemer ozüng yanglur 114 liasü, ta King Sultan Abdullah Sultan Ahmad Shah-i ashi. Pai ashiba agi, arishi küm 61 tain Ismail ya Malaysia indang ato kilonser tukobuba ama Honibarnü tenangzükba agitsü.

Chubai state Malay yimsüsür ajuruba sülen iba osang ya sangdonga liasü. Malaysia nung chuba mapa ya timba sentong balala nung shilem agitsüba dang lir, saka Parliament nung nübu timbai busemer ta pai bilemba ka ato kilonser shimteter.

Ismail shimba ajanga linük yimtenren tsütsü mangatetep aliba tatem kati arutsü teimla lir, ta Sultan Abdullah-i sangdong ka nung ashi. Pai ozüng yanglurtem dang yimtenren tsütsü mangatetep adokba sülen Hombar nungi menden yutsütsüsa akum.

Ismail shimteter ya ajanga Muhyiddin indang alliance tanaben arudaksür. Ajidang masü United Malays National Organisation ajanga yimsüsüba tanaben angutsü, shirnoki 1957 küm Britain dang nungi nüjiso anguba sülen yimsü süa aru, saka sen dollar billion aika jenjang senotsü tsütsü tim masü mapa inyakba ajanga

**Kuala Lumpur, Luroi/August 20 (Agencies):** Malaysia chubai Ismail Sabri Yaakob ya linük nung lenir tasenba sütsü Hokulbarnü shimteterba sülen iba linük nung talangtiba yimsü asüba party tanaben meyipa arur.

Ismail ya Muhyiddin Yassin sorkar kübok deputy prime minister inyaka liasü, shibai ita 18 majung yimsü süa arur par coalition tsungta mangatetep

Ismail shimteter ya ajanga Muhyiddin indang alliance tanaben arudaksür. Ajidang masü United Malays National Organisation ajanga yimsüsüba tanaben angutsü, shirnoki 1957 küm Britain dang nungi nüjiso anguba sülen yimsü süa aru, saka sen dollar billion aika jenjang senotsü tsütsü tim masü mapa inyakba ajanga

## IFFM Awards 2021: Manoj aser Samantha nati Best Actor award angu

**New Delhi, Luroi/August 20, 2021 (Agencies):** India aser subcontinent nung yangluba film tajungtem shima tetushi agütsütsü asoshi, küm shia 'Indian Film Festival of Melbourne' (IFFM) sentong ayonga agir. Ajsüaka, Covid-19 dak sendakba tetuyubatem nung anidaka, Hokolbarnü (20.08.2021) 'IFFM 2021' sentong online ajanga agia liasü. Taküm, iba award sentong nung, Pankaj Tripathi nem 'Diversity in Cinema Award' agütsü.

Raj Nidimoru aser Krishna DK na indang 'The Family Man' ajanga Indian Film Festival of Melbourne (IFFM) nung takok tajung nguogo. Iba series (The Family Man) nung Manoj Bajpayee aser Samantha Akkineni nati tongti shilem agir aser nungtugu web series nung tenati shilem tajung agiba asadanteta, tena nem 'Best Actors' award agütsü.

Hokolbarnü, IFFM sentong achaayangertemi virtual ajanga iba sentong ayongzüka liasü, kong, takok angur tenüing balala sangdongogo. Manoj-i "Best Actor (Male) in Series" aser Samantha-i "Best Actor (Female) in Series" award ngua

liasü. "Jury züngsemtem dang kanga pelar. Iba show asangsang nung ataloktsüsa shilem tulu agiba atema, 'The Family Man' team ajunga dang pelaba lemsateper," ta virtual sentong nung Manoj-i ashi.

Kasa sentong nung, actors Vidya Balan aser Surya napronglai 'Sherni' aser 'Soorarai Pottru' atema "Best Actor in Feature" award nguogo. Film yanglur Anurag Basu-i LUDO atema 'Best Director' award angu.

IFFM 2021 nung, Richa Chadha, Guneet Monga, Onir, Australia nung film yanglur Geoffrey Wright aser Oscar-nominee editor Jill Bilcock nung jury züngsem ama sentong nung denogo.

Iba den külemi, artists talisa Anurag Kashyap, Shoojit Sircar, Thiagarajan Kumararaja aser Sriram Raghavan nungeri sentong nung shilem agia liasü.

\* Indian Film Festival of Melbourne (IFFM) 2021 nung takok angurtem:

- Best Director: Anurag Basu (LUDO)  
- Best Director (Honorary Mention): Prithvi Konanur

for Pinki Elli?  
- Best Performance Female (Feature) - Vidya Balan (Sherni)  
- Best Performance Female (Feature) (Honorary Mention): Nimisha Sajayan (The Great Indian Kitchen)  
- Best Performance Male (Feature): Suriya Sivakumar (Soorarai Pottru)  
- Best Performance Male (Series): Manoj Bajpayee (The Family Man 2)  
- Best Performance Female (Series): Samantha Akkineni (The Family Man 2)  
- Best Web Series: Mirzapur Season 2  
- Diversity in Cinema Award: Pankaj Tripathi  
- Equality in Cinema (Short): Sheer Qorma  
- Equality in Cinema (Feature): The Great Indian Kitchen, God on the Balcony  
- Best Documentary: Shut Up Sona  
- IFFM Disruptor Award: Sanal Sasidharan  
- Best Indie Film: Fire in the Mountains  
- Best Film: Soorarai Pottru

## BTS-i 'Map of the Soul' tour athir

**New Delhi, Luroi/August 20, 2021 (Agencies):** Nungtugu K-Pop band - BTS-i parnok indang 'Map of the Soul' thitsüba sangdongogo, koba April 2020 nungi iba tour atema anogo atsülangia aru.

Korea indang web sabang - Weverse, reports nme.com ajanga Big Hit Music-i band indang tour athiba osang sangoktsü.

"Iba Tour tenzüksü atema fans tem kanga yongya ataba meteta, 'BTS MAP OF THE SOUL TOUR' sentong tenzüksü atema company-i kanga meranga inyakogo. Ajsüaka, onoki mazioktettsüsa

tena (Covid-19) melenshia aoba yong, taoba mapang renemba ama iba Tour tepor junga aser mera keta tenzüksü asoshi tasak kümogo. Ibayongji, BTS MAP OF THE SOUL TOUR sentong thitsüba sangdonger," ta sangdong ajanga metetdaksü.

"BTS MAP OF THE SOUL TOUR tenzüksü asoshi mapang talangka nungi yongya atar fans ajak dang tatok meshir. Nenok teimla ataloktsütsüsa, mapang tetemjen ka nung iba sentong agitsü asoshi onoki asalentong yanglua inyakdaki; aser takaratiba nung nenok dang osang metetdaksütsü," ta kasa sangdong nung shia lir.

BTS mesüra 'Bangtan Sonyeondan' telok nung Jin, Suga, J-Hope, RM, Jimin, V aser Jungkook nung dena lir. Iba kentener telok dang 'Bangtan Boys' ta ajar.

Taoba küm (2020) April ita BTS puri BTS MAP OF THE SOUL TOUR tenzüksü asoshi sentong renemer liasü, saka alima ajunga asüingba Covid-19 wara ajanga iba Tour den Seoul nung sentong pezü tashi thitsütsüsa kümadak.

Iba sülen, Covid-19 wara süshia maoba asangteta, parnoki item sentong atema anogo atsülangtsü osang sangdonga liasü.

## Noklak DPDB senden agiogo

**Noklak, Luroi/August 20, 2021 (TYO):** Mongolbarnü, DC Conference Hall, Noklak nung Deputy Commissioner & vice chairman DPDB Noklak, Hiazu Meru-i anir Noklak District Planning & Development Board senden agiogo, ta sangdong ajanga metetdaksü.

DPDB züngsemtem den mezüing senden amener asünung, Hiazu Meru-i DPDB züngsem ajak dang amalitepa aser longjemer inyaksü asoshi mepishiogo, ajiasünungang terenlok maparen ajak nung Noklak District tejakleni aotsü, ta pai ashi.

District tasen ka atema item maparen ajak inyaksü asoshi tayongzüka tulu asütsü, anungji district ajungkettsütsü asoshi asenok ajaki tajungtiba nung inyaksü merangdi, ta pai ashi.

Noklak district nung nüburttem anisüngzüka lidaktsütsü aser ajangzükdaktsütsü asoshi DPDB Noklak ajanga temelenshi tulu adokdaksütsü imlar, ta pai lemsatep.

Meru-i DPDB züngsem ajunga dang longjemer inyaksü asoshi ayongzüka aser tebilemba/tasa tasentem bener

arutsü/lemsateptsü atema züngsemtem ajungshia liasü.

Iba senden agiba mapang, teloki Noklak Town agizük aser iba jila tajungba yanglutsü atema pei pei department nung maparen achaayanga inyaksü asoshi telok bangjemtepogo.

Noklak Town nung Officers' Club tentetsü asoshi jembitepba liasü aser Deputy Commissioner lenisüba nung committee ka tentetsü asoshi teloki lemtet.

Noklak nung officer tem tsüingda tesendaktep tali tajungba yanglutsü asoshi, teloki District kübok office balala nung kasa mapatong tenzüksü asoshi olemtepa liasü.

Scrub Thypus, Thyphoid aser Peripheral Neuritis, koba Noklak tesem nung kanga bulua adokba tashidak ka lir, item tashidak nung preliminary case study agitsü atema board-i committee ka tentet.

Iba committee nung EAC Noklak, B. Pukha Lam; Medical Officer, CHC Noklak, Dr. Chongya aser SDO PHED Noklak, Er. Khaoshai Lam nung shimogo.

Nüburttem ayong ayonga senzusenbongtsü atema, Noklak nung local taxi service

achaayangtsü/tenzüksü asoshi teloki asadangshia jembiogo.

Iba service tenzüksü ajanga, district nung mapa mangu (unemployed) alir lanurtem pei poksüing atema inyaksü asoshi maongka ama asütsü aser iba den külemi nüburttem senzusenbongtsü asoshi timtem pungbadaktsütsü, ta teloki ajungshia liasü. Iba service atema, Rate Fixation Committee ajanga taa (rates) latetsü, ta teloki lemtet.

Kasa seden nung, Noklak nungi Kohima aser Dimapur tashi NST bus service tenzüksü asoshi board olemtepa liasü; aser iba maparen tenzüksü atema tim tekolakpur dangi tebilembatem benoktsü asoshi teloki agizük.

Maneni, SDO (Civil) Thonoknyu, Longdiba Sangtam-i, Tuensang aser Noklak nungi Thonoknyu sub-division den sendaktepba lenmangtem kanga mejungi raksar aliba board dang metetdaksü. Iba dak sendakba nung, telok olemtepa liasü aser iba maparen repringshimtsü asoshi tim Department dang osang agütsütsü telok bangjemtep, ta kasa sangdong nung shia lir.

## Sür Küm 2 Ajungba Bilemteter

Asür. MOAYAPANG LONGKUMER  
"Kanga karara toktsür ao, saka kodanga mamatetsüsa  
mapa tajung aika inyaka yutsüogo"



Asü: 21.08.2019

Nai onok toktsür orr tanü küm 2 abensar. Nai inyaka yutsüba mapa tajungtem menungraseta na onok den maliba atema onok kanga rongjener. Onoki na kodanga mamatsü aser onok molungjang nung na kanga senti süa teti bilemteter.

**Onoki na kodanga mamadoktsü,  
Kinunger aser medemertem.**



OFFICE OF THE  
**UNGMA SENSO MUNGDANG**

**TENÜNGSANG AGÜTSÜR**

Ungma Senso Mungdang Office ajanga agüja aliba lenir aser wadang balala nung inyaker, nenoki takok t ngua kongnang tetushi tulu Ungma Sensosanger nem bener arutsü nung Sensosangeri nenok ajak nem tenüngsang agütsür.

- Wb. Lanutemsu**, S/o Wb. Nungshikaba Imsong, Deputy Commandant 2nd NAP Alichen.
- Wt. Dr. Imnabenla Jamirtsür**, D/o Wb. Marlepden Jamir, Senate of Serampore University kübok nungi Doctorate jenjang ngutet. La indang Dissertation topic "Towards a Relevant Sexual Ethics for India: Indian Churches engagement with Homophobia with special reference to the work of the National Councils of Churches"
- Wb. Imsongmeren Imsong**, S/o Wb. Repatemsu Imsong, Asst. Plant Protection Officer, Under Staff Selection Commission (SSC) 2019 Govt. of India.
- Wb. Imtiakum Longkumer**, S/o Wb. Toshipokba Lkr, pai mezüingbuba jenjang JAA (Junior Account Assistant) Exam Conducted by Directorate of Treasurer & Account Govt. of Nagaland jenjang ngutet.
- Wb. Masatuba Longkumer**, S/o Wb. Kojangkoba Lkr, Peon, Directorate of Rural Development Govt. of Nagaland, Governors Commendation Certificate Independence Day 2021 nung ngutet. Iba den külemi Ungma Senso nungi kaketshir (tepur & Tetsür) shirnokisa 2021 tatidang jenjang balala nungi takok bener aruogo, nenok nem Ungma Senso Mungdang Office ajanga tenüngsang tulu agütsür.

Tsüngremi asen Ungma Sensosanger wadang balala nung inyaker kaketshir ajak maneni len ania moajangma.

Sd/-  
Tijungba Lkr, Tatar  
President  
Ungma Senso Mungdang

Sd/-  
Senmoaba Imsong  
General Secretary  
Ungma Senso Mungdang

## Office of the MERESHIBA ASO KIDONG

Chuchuyimlang Village  
P.O.Chuchuyimlang Town - 798614  
Dist. Mokokchung, Nagaland

**KONANG NÜNGSANG**



Chuchuyimlang Mereshiba aso kidong nungi Soja Sotet Wb. Wapang Jamir IPS, IGP INT-I Gujarat, S/o Mr & Mrs. M.Chuba Jamir, 75th Indian Independence anogo 2021 nung President's Police Medal for Meritorious Service award agizükba nung nüburttem ajak tepela peridaktsüogo. Ano tarutsü anogo nunga Tsüngremi ne mapa wadang tuluba asoshi moajangma ta ajaki sarasademtsür.

Sd/-  
Aosanen, President

Sd/-  
Lanulemba, Secretary.

# Dubai nung CSK pur training tenzükogo



Chennai Super Kings Dubai training agiba noksa nung angur.

New Delhi, Luroi/August 20, 2021 (Agencies): T20 League tenzüksü lia, MS Dhoni-i anir asemben tashi Indian Premier League (IPL) asayamung takok angur telok - Chennai Super Kings pur Dubai kübok training tenzükogo.

Taküm May tetenzüklen franchise indang bio-bubble telungtet nung asayar kar dak Covid-19 positive putetba sülen, tom nung 14buba IPL asayamung thitemja liasü. Iba asayamung tenzükshia, taoba IPL takok angur Mumbai Indians aser CSK na Dubai nung asayatsü.

CSK-i training agiba tesem

nung par captain MS Dhoni tangokba noksa ka lemsatet.

Tan ita tetenzüklen, training camp ka atema CSK asayatem Chennai nung adenshia liasü. Dhoni, Suresh Raina, Deepak Chahar aser Robin Uthappa densema CSK nung tongti asayatem aser team nungi tanga züngsemtem August 13, 2021 nü Dubai tonga aru.

Covid-19 ajanga Indian Premier League manentsüdag, CSK pur point 10 tashi ngua IPL 2021 points table nung parnok jenjang tanabuba nung liasü.


Tan IPL season nung,

Chennai indang franchise-i game 7 nungi asaya 5 kokogo aser point table nung parnok Delhi Capitals tesülen tanabuba jenjang nung liasü. Delhi Capitals pur asaya 8 nungi point 12 ngua lir.

Iba asayamung anogo atsülangtsü telemtetba magidang, Royal Challengers Bangalore aser Mumbai Indians team tasembuba aser pezübuba jenjang nung liasü.

Taoba küm domestic T20 league asayamung nung junga masayatetba sülen, taküm tanünga IPL asayamung playoffs tongteta CSK puri shilem agitsü imlar.

# Arsenal-i Martin Odegaard alizükogo



Martin Odegaard

London, Luroi/August 20, 2021 (Agencies): Arsenal-i "permanent deal" nung, Real Madrid nungi Norway International team nung asayar Martin Odegaard alizükogo, ta Hokolbarnü Premier League club - Arsenal-i ashi.

Taoba season tesadangka tashi, midfielder Martin loan nung Arsenal atema asaya liasü, kong tetoktepba balala nung pai asaya 20 nung shilem agi. Iba mapang, Arsenal puri goal 2-1 agi Tottenham Hotspur madak takok anguba densema, pai goal

ana tashi idaktsü.

Arsenal-i Martin Odegaard alizükba dak sendakba nung osang tejangja magütsü, saka osangbener sangdong ajanga angazükba agi, küm pezü atema contract nung arishi küm 22 tain Martin alizüksü asoshi, parnoki (Arsenal) pa nem euro million 35 (\$40.88 million) shi agütsütsü asoshi züngzüktepegog.

"Pa (Odegaard) aniokba ajanga club tajungba akümtsü. Iba football club nung tangar asoshi tatishitsü ka asütsü aser tasa tajung alir asayatem kanga nungdak. Item sentong ataloktsü asoshi onoki lenmang balala bushitsü nungdaker," ta Manager, Mikel Arteta-i ashi.

Aruya aliba Deobarnü, Arsenal aser Chelsea na Premier League asayatsü lia, osangbener den jembiba mapang Mikel-i tebilemba lemsatetba liasü.

"Pa (Odegaard) asayar tasen ka dang, saka club tulu nung pai asaya aruogo aser tajangshiba jenti lir. Pa dak football asayatsü sempet balala lir aser iba club nung pa anioktsü asoshi sentong tem atalokba atema pelar aser

iba den külemi "permanent deal" nung onoki Martin alizükogo," ta Mikel-i ashi.

Martin Odegaard, shibai Norway national football team atema asaya 30 nung shilem agia lir, arishi küm 15 alidang pai international football nung ajemoka asaya tenzük aser national team tenung nungi Martin asayar tanubusang aküm.

Ita trok sülen, pai Real Madrid nung aden saka tetoktepba ajunga nungi pai match 11 dang asaya. January ita Arsenal nung madandang, loan nung Martin-i Heerenveen, Vitesse aser Real Sociedad club nung asayaogo.

Arsenal Club nung centre back Ben White, midfielder Albert Sambi Lokonga aser left back Nuno Tavares nung bendenlokba sülen, tan season nung Mikel Arteta-i club atema alizükter asayar rongnung Odegaard pezübuba asütsü.

Arsenal puri Martin indang visa clearance atar astünung, Deobarnü Chelsea den asayba mapang club (Arsenal) nung pa masayatetsü, ta Club-i ashi.



New Delhi, Luroi/August 20, 2021: Aruya aliba Tokyo Paralympic Games atema, Hokolbarnü, coach JP Singh den India nung 'powerlifter' Jaideep Kumar aser Sakina Khatun naprongla Tokyo-i ogo. Tokyo Paralympics nung Jaideep Kumar-i 'Men's 65 kg category' aser Sakina Khatun-i 'Women's 50 kg category' nung shilem agitsü. August 24, 2021 nü powerlifter anapronglai pei pei tata category nung medal atema tokteptsü.

# WTT Contender: Manika aser Sathiyani nati takok angu

Budapest, Luroi/August 20, 2021 (Agencies): Hokolbarnü, WTT Contender asayamung nung, India nung Manika Batra aser G Sathiyani nati 3-1 agi Hungary nung Dora Madarasz aser Nandor Ecseki tsükdakja temeyoktep tarep title kokogo.

Iba title koktettsü atema Manika aser Sathiyani nati rank 94buba temeyoktep tarep Dora aser Nandor madak 11-9, 9-11, 12-10, 11-6 agi takok angu.

WTT Contender Budapest 2021 asayamung nung Manika aser Sathiyani nati temeyoktep tarep title akokba ya kodanga mamatetsü. Taoba mapang, tenati temeyoktep tarep asaya aika nung külemi shilem agidanga mali.

Manika-i Sharath Kamal den longjemer Asian Games bronze medal angu. Tawa tembangba Tokyo Olympics nunga Manika aser Sharath na külemi temeyoktep tarep nung asayaogo.

Iba asayamung nung, rank 60buba Manika-i semifinal tashi tongteta asayaogo. Ano, külem India tsür Sreeja Akula-ia junga asaya liasü. Tetsür kija quarter final nung Manika-i la tsükdaktsü.

Tokyo Olympics - tebur kija table tennis tetoktepba mezüng round nung Sathiyani tamakok anguba sülen, tang Budapest nung asaya aliba WTT Contender asayamung nung pai temeyoktep tarep title takok angur asütsü.

# Cincinnati Masters: Osaka tasembuba round nung tsük



Cincinnati, Luroi/August 20, 2021 (Agencies): ATP aser WTA Cincinnati Masters asayamung tetsür kija tasembuba round asaya nung, World no. 2 Naomi Osaka-i Jil Teichmann makokba sülen, la iba asayamung nungi tsükogo. Taküm season tenzükter külen nungi, Cincinnati Open nung Osaka kanga mejungi tamakok angur asütsü.

US Open atema renemshiba asayamung nung, rank 76buba Switzerland tsür Jill-i 3-6, 6-3, 6-3 agi pezüben Grand Slam takok angur Osaka tsükdakja quarter final tongtet.

Iba asaya nung Osaka-i 'unforced errors' 41 aser win' 17 angu. Kasa mapang, Teichmann-i unforced errors' 29 den win' 21 zükloksü.

"Iba asaya koktetba ya kanga dang süngmangseter," ta Jill-i ashi.

"La (Osaka) ya Grand Slam takok angur asayar tajung ka lir aser la den toktepa asayatsü tezüba masü. Ajisiuaka, asaya tejakleni bener aotsü asoshi meranga tokteptsü," ta Jill-i shisem.

Roland Garros tasayadak nung timtem kar ajanga asayamung tom nungi tukadokba aser Wimbledon nung shilem magiba sülen nungi Osaka-i taoba ama tennis junga masayateti arudar.

Tokyo Olympics - tennis asayamung nunga tetsür kija tasembuba round nung Osaka tsükadok aser hardcourt asayamung asaya ana nung dang shilem agir sülen, August 30, 2021 nungi tenzüksü aliba US Open asayamung nung lai shilem agitsü renemdar.

Kasa asayamung tebur kija round of 16 asaya nung, seed tanabuba Stefanos Tsitsipas-i Italy nung Lorenzo Sonego madak 5-7, 6-3, 6-4 agi takok nguogo.

"Ni zükloksüba shot ajunga pai nokdangteta asaya. Pai (Sonego) iba dang nungi tajungba asayatsü akok," ta Tsitsipas-i ashi.

Semi final tongtettsü atema, Tsitsipas-i Canada nung F. Auger den quarter final asayatsü.

Round of 16 asaya tanga ka nung Auger-i 6-4, 6-3 agi Italy nung Berrettini tsükdaktsü.

## BILEMDANGANG

"Tenükmeremer tsüngdang tajung achitetba kecha mali."